

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՔՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ
P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Է. Տարի, Թիւ 286, Ուրբաթ, 05 ՅՈՒՆԻՍ, 2015

ՀԱՄԱՅՆՔԱՅԻՆ

ՊԱՀՐԷՅՆԻ ԵՒ ՔՈՒԷՅԹԻ ԿԱԹՈՂԻԿԷ ԵԿԵՂԵՑԻՈՅ ԱՌԱՋՆՈՐԴԸ ԱՅՑԵԼԵՑ ԱԶԳԱՅԻՆ ԱՌԱՋՆՈՐԴԱՐԱՆ

Չորեքշաբթի, 3 Յունիս 2015-ի առաւօտեան, Թեմիս Առաջնորդ՝ Գերայ. Տ. Մասիս Ծ. Վրդ. Զօպույեան, Առաջնորդարանի իր գրասենեակին մէջ ընդունեց Պահրէյնի եւ Քուէյթի Կաթողիկէ եկեղեցւոյ Առաջնորդ՝ Քամիլլօ Արք. Պալլինը, որու նստավայրը Պահրէյնն էր եւ Քուէյթ այցելութեան եկած էր:

Գերայ. Հայր Սուրբն ու Կաթողիկէ Արքեպիսկոպոսը անդրադարձան շրջանս մտահոգող հարցերու, աղօթատեղիներու եւ ընդհանրապէս քրիստոնէայ գաղութները հովուելու դժուարութիւններու մասին: Հանդիպումը առիթ մը եղաւ նաեւ խօսելու Քուէյթի եկեղեցիներու եւ քրիստոնէայ համայնքներու ներկայ իրավիճակի մասին:



Հանդիպման ներկայ էին նաեւ գաղութիս հոգեւոր հովիւ՝ Արժ. Տ. Արտակ Քհնյ. Քէհեաեանն ու Մարոնիթ եկեղեցւոյ հոգեւոր հովիւ՝ Հայր Ռիմոն Իտը:

ՅԱՅՏԱՐԱՐՈՒԹԻՒՆ

Քուէյթի Ազգային վարժարանը կարիքը ունի մանկապարտեզի ուսուցչուհիներու: Դիմորդները պէտք է ունենան.-

1-Համալսարանական բարձրագոյն կրթութիւն՝ նախընտրաբար մանկավարժութիւն:

2-Նուազագոյնը երեք տարուայ փորձառութիւն:

3-Ունենալ երգի, պարի, նուագի կամ նկարչութեան հմտութիւններ:

Դիմումնագրերը փոխանցել վարժարանի տնօրէնութեան՝ մինչեւ 10 Յունիս 2015

Ծանօթ: Քուէյթէն դուրս գտնուող դիմորդները պէտք է ունենան Հայաստանի քաղաքացիութիւն:

ՀԱՅԿԱԿԱՆ

**Պրագիլի Օերակոյտը Կը Ճանչնայ Հայոց
Ցեղասպանութիւնը**

Պրագիլի դաշնակցային Օերակոյտը 3 Յունիսին վաւերացուց Հայոց ցեղասպանութիւնը ճանչցող բանաձեւ:



Թիւ 550/2015 բանաձեւը ներկայացուած էր ծերակուտականներ Ալիոզիո Նունեզ Ֆերէյրա Ֆիլոյի եւ Հոզէ Սերայի կողմէ: Հոն միաժամանակ կոչ կ'ըլլայ Հայաստանի հետ յարաբերութիւնները սերտացնելու:

Բանաձեւը ներկայացուցած ծերակուտականները նաեւ կոչ ուղղած են Թուրքիոյ, որ ճանչնայ Հայոց ցեղասպանութիւնը եւ շինիչ երկխօսութեան սկսի Հայաստանի իշխանութեանց հետ:

Պրագիլի Հայ դատի յանձնախումբէն Ճէյմս Օննիկ Թամաճեան ողջունեց բանաձեւին վաւերացումը, որ կը համընկնի Հայոց ցեղասպանութեան 100-ամեակին:

**Սարգսեան Հայ – Ճափոնական Կապերու Խորացում
Կ'ակնկալէ**

Հայաստանի Հանրապետութեան մէջ Ճափոնի նոր դեսպան Էյծի Թակուչի Չորեքշաբթի օր իր հաւատարմագիրները յանձնեց նախագահ Սերժ Սարգսեանին:

Նախագահը շնորհաւորեց Թակուչին եւ շեշտեց, որ մեծ պատիւ եւ պատասխանատուութիւն է ըլլալ նստավայրը Հայաստան եղող Ճափոնի առաջին դեսպանը եւ ներդրում ունենալ երկու պետութիւններու ու ժողովուրդներու բարեկամութեան շարունակական ամրապնդման գործին մէջ: Նախագահ Սարգսեան նշեց, որ վերջին տարիներուն Հայաստանի եւ Ճափոնի միջեւ յարաբերութիւններու զարգացման դրական աշխուժութիւն արձանագրուած է, եւ յոյս յայտնեց, որ Հայաստանի մէջ Ճափոնի նորաբաց դեսպանութեան աշխատանքը կը նպաստէ այդ աշխուժութիւնը պահպանելու, բոլոր մարզերուն մէջ հայ – Ճափոնական բարեկամական կապերը խորացնելու եւ երկկողմանի բարձր մակարդակի համաձայնութիւնները կեանքի կոչելու գործին:

Հանրապետութեան նախագահը ջերմութեամբ յիշեց 2012-ին Ճափոն իր այցելութիւնը եւ արդիւնաւէտ հանդիպումները, որոնք, նախագահ Սերժ Սարգսեանի խօսքով, նոր իրթան հանդիսացան համագործակցութեան երկկողմանի օրակարգը ընդլայնելու եւ յառաջ մղելու գործին մէջ:

Դեսպանը վստահեցուց, որ պիտի ներդնէ իր բոլոր ջանքերը՝ պահպանելու երկկողմանի միջպետական յարաբերութիւններուն մէջ ձեռք բերուած յառաջընթացն ու խորացնելու փոխըմբռնման ուղղուած հաղորդակցութիւնները եւ համագործակցութիւնը տնտեսութեան, մշակոյթի եւ շարք մը այլ մարզերու մէջ:

Ազրպեյճան Կ' առաջարկէ Ընդլայնել Մինսքի Խմբակին Չեւաչափը

ԵԱՀԿ-ի գործող նախագահ, Սերպիոյ առաջին փոխվարչապետ, արտաքին գործոց նախարար Իվիցա Տաչիչ, շաբաթասկիզբին Պաքուի մէջ ունեցած հանդիպումներէն ետք, Չորեքշաբթի օր հասաւ Երեւան, ուր Հայաստանի արտաքին գործոց նախարար Էդուարդ Նալբանդեանի հետ տեսակցութենէն ետք տրուած միացեալ մամլոյ ասուլիսին ընթացքին ըսաւ, որ Ազրպեյճան կ'առաջարկէ աւելցնել ԵԱՀԿ-ի Մինսքի խմբակի համանախագահներուն թիւը: «Կը կարծեմ, որ ասիկա նոր առաջարկ չէ, սակայն այս առաջարկը ընդունելու համար մենք կարիք ունինք համախոհութեամբ տրուելիք որոշման, որ կ'ընդունուի մասնակից բոլոր երկիրներուն կողմէ: Թերեւս այս հարցը ուսումնասիրենք ապագային, բայց, կը կարծեմ, որ ԵԱՀԿ-ի Մինսքի խմբակը պետք է շարունակէ աշխատիլ: Եթէ որեւէ կողմ գոհ չէ աշխատանքի արդիւնքներէն, այսուհանդերձ ասիկա միակ ձեւաչափն է, որուն ծիրին մէջ տարաբնոյթ բանակցութիւններ կ'ընթանան, երկխօսութիւն տեղի կ'ունենայ, եւ ասիկա պետք է պահպանուի», ըսաւ Տաչիչ:

Վերջին տարիներուն պաշտօնական Պաքուն շարունակաբար կը դժգոհի 23 տարի առաջ Լեռնային Ղարաբաղի տագնապի խաղաղ լուծման աջակցելու նպատակով ստեղծուած միջնորդական այս խմբակի աշխատանքէն:

Հայաստանի Հանրապետութեան արտաքին գործոց նախարար Էդուարդ Նալբանդեան լրագրողներուն խնդրանքով անդրադարձաւ Մամետեարովի յայտարարութեան, թէ Ազրպեյճան պատրաստ է տեղաշարժի Լեռնային Ղարաբաղի տագնապի բանակցային հոլովոյթին մէջ:

Պատասխանելով այն հարցումին, թէ արդեօք ասիկա լուստեսութեան հիմքեր կու տայ՞, Նալբանդեան պատասխանեց, որ պէտք է պարզել, թէ որո՞ւ կողմէ կը սպասեն տեղաշարժ՝ միջազգային հանրութեան կողմէ, թէ՞ իրենց կողմէ:

«Որովհետեւ մինչեւ այսօր Ազրպեյճան բաւական ապակառուցողական եւ անիրատես դիրքորոշում կը դրսեւորէ Լեռնային Ղարաբաղի տագնապի խաղաղ լուծման վերաբերեալ: Վերջին անգամ ասիկա ակնյայտ եղաւ Ռիկայի վեհաժողովին մէջ, ուր հաւաքուած էին Եւրոպական Միութեան 28 երկիրներու եւ արեւելեան գործընկերութեան անդամ երկիրներու ղեկավարները: Այդ բոլոր երկիրները, բացի Ազրպեյճանէն, Լեռնային Ղարաբաղի տագնապին վերաբերեալ համաձայնեցան մէկ ձեւակերպման, որ ներառուեցաւ Ռիկայի հռչակագիրին մէջ: Ասիկա կը վերաբերէր Լեռնային Ղարաբաղի տագնապի լուծման: Ընդհանրական ձեւակերպում էր այն մասին, որ այդ բոլոր երկիրները կ'աջակցին Մինսքի խմբակի եռանախագահներու ջանքերուն, նաեւ կ'աջակցին այն ծանօթ հինգ յայտարարութիւններուն, որոնք եղած են Մինսքի խմբակի եռանախագահ երկիրներու ղեկավարներուն կողմէ Լեռնային Ղարաբաղի տագնապի լուծման վերաբերեալ: Ազրպեյճան հակադրուեցաւ այդ դիրքորոշման՝ ցոյց տալով, որ ոչ մէկ տեղաշարժ, ոչ մէկ փոփոխութիւն կատարուած է իր դիրքորոշման մէջ: Եթէ այսուհետեւ իրենք մտադիր են փոխել եւ աւելի կառուցողական մօտեցում ցուցաբերել, այո, ինչո՞ւ ոչ: Կ'ապրինք եւ կը տեսնենք», յայտարարեց ան:

Լրագրողները նաեւ հետաքրքրուեցան Պրազիլի Ծերակոյտին կողմէ Հայոց ցեղասպանութեան ճանաչման կապուած վերջին խօսակցութիւններով:

«Ի վերջոյ ի՞նչ տեղի ունեցաւ Պրազիլի մէջ: Ճանչցա՞ւ արդեօք Ծերակոյտը, թէ՞ ոչ», հարցումին նախարար Նալբանդեան վերահաստատեց իր նախապէս ըսածը՝ աւելցնելով. «Ատոր մասին

համապատասխան որոշումը երեքշաբթի հրապարակուած է Պրազիլի Ծերակոյտին կողմէ եւ դրուած է իրենց կայքին մէջ: Կրնամ վերահաստատել, որ Հայաստան կ'որոշունէ Պրազիլի Ծերակոյտին տուած որոշումը, որով Ծերակոյտին կողմէ կը ճանչցուի Հայոց ցեղասպանութիւնը»:

Բ. Սահակեան – Իվիցա Տաչիչ Տեսակցութիւն

Լեոնային Ղարաբաղի նախագահ Բակօ Սահակեան Երեւանի մէջ Չորեքշաբթի օր տեսակցեցաւ ԵԱՀԿ-ի գործող նախագահ, Մերպիոյ արտաքին գործոց նախարար Իվիցա Տաչիչի հետ:

Քննարկուեցան ազրպէյճանական-ղարաբաղեան տագնապի լուծման եւ շրջանային հարցեր:

Նախագահ Սահակեան նշեց, որ պաշտօնական Ստեփանակերտ կողմնակից է տագնապի խաղաղ լուծման ԵԱՀԿ-ի Մինսքի խմբակի ծիրին մէջ եւ ընդգծեց բանակցային լիարժէք ձեւաչափի վերականգնման անհրաժեշտութիւնը, ատիկա նկատելով հոլովոյթի առանցքային տարրերէն մէկը:

Լեոնային Ղարաբաղի նախագահը նաեւ նշեց Ազրպէյճանի խիստ ապակառուցողական քաղաքականութիւնը՝ Պաքուի կեցուածքը անուանելով իբրեւ շրջանին մէջ կայունութեան սպառնալիք, միջազգային չափանիշներու եւ սկզբունքներու կոպիտ ոտնակոխում:

Տեսակցութեան նաեւ մասնակցեցան Լեոնային Ղարաբաղի արտաքին գործոց նախարար Կարէն Միրզոյեան եւ ԵԱՀԿ-ի գործող նախագահի անձնական ներկայացուցիչ Անճէյ Քասփրչիք:

Արցախի Պաշտպանութեան Նախարարը Կը Տեղափոխուի Հայաստան



«Հայելի» կայքը կը տեղեկացնէ, թէ յառաջիկային հրաժարական պիտի տայ Լեոնային Ղարաբաղի Հանրապետութեան պաշտպանութեան բանակի հրամանատար, պաշտպանութեան նախարար զօրավար Մովսէս Յակոբեան: Ըստ լուրերուն, ան պիտի տեղափոխուի Հայաստան:

«Երկիր»-ի հետ զրոյցին ընթացքին Մովսէս Յակոբեան անդրադարձաւ այս հարցին:

«Զինուորականին չ'արտօնուիր նման տեղեկութիւն տրամադրել: Ատիկա եւ չեմ որոշեր», ըսաւ ան:

Պատասխանելով այն հարցումին, թէ առաջարկ ներկայացնելու պարագային կը համաձայնի՞ տեղափոխուիլ Հայաստան, ան պատասխանեց. «Ոչ մէկ բան կը բացառեմ: Տակաւին կ'որոշենք: Մենք զինուորական ենք, ծառայութեան մէջ ենք եւ մենք չենք որոշեր, թէ ո՛ր պէտք է ծառայենք»:

Ըստ «Երկիր»-ի տեղեկութիւններուն, Մովսէս Յակոբեան պիտի նշանակուի Հայաստանի Հանրապետութեան պաշտպանութեան փոխնախարար: Շատ հաւանական է նաեւ անոր՝ Հայաստանի Հանրապետութեան բանակի հրամանատար նշանակուիլը:

Երիտասարդ Երոպական Ընկերվարականներ Կազմակերպությունը Հայոց Ցեղասպանության Վերաբերյալ Բանաձևի Ընդունում է

ՀՅԴ Բիւրոյի Երիտասարդական գրասենեակը կը հաղորդէ, որ 29-30 մայիսին Լաթվիոյ մայրաքաղաք Ռիկայի մէջ տեղի ունեցաւ Երիտասարդ Երոպական ընկերվարականներու Բիւրոյի ժողովը: Ժողովին կը մասնակցէին կազմակերպութեան բոլոր լիիրաւ անդամները:

ՀՅԴ Երիտասարդականին կողմէ ժողովին կը մասնակցէր մէկ ներկայացուցիչ՝ Արէն Քերթեշեան (Ֆրանսա): Ժողովի օրակարգին մէջ ներառուած էին կազմակերպութեան յառաջիկայ երկու տարիներու գործունէութեան ծրագրի մշակումը, Երոպական ընկերվարականներու կուսակցութեան ժողովի օրակարգի քննարկումը, ամառնային ճամպարի հետ կապուած կազմակերպական հարցերը եւ անդամ կազմակերպութիւններու կողմէ ներկայացուած բանաձեւերու քննարկումն ու որդեգրումը: ՀՅԴ Երիտասարդականը եւ Ֆրանսայի Երիտասարդ ընկերվարականներու շարժումը Հայոց ցեղասպանութեան 100-րդ տարելիցին առիթով ներկայացուցած էին միասնական բանաձեւ, որուն մէջ կոչ կ'ուղղուէր Երիտասարդ Երոպական ընկերվարականներուն՝ ճանչնալու Հայոց ցեղասպանութիւնը, դատապարտելու Թուրքիոյ ժխտողական քաղաքականութիւնը եւ, կոչ կ'ուղղէր Թուրքիոյ իշխանութիւններուն սկսելու հատուցման հոլովոյթին:

Բանաձեւի քննարկումը անցաւ բուռն եւ լարուած մթնոլորտի մը մէջ: Թուրքիոյ Հանրապետական ժողովուրդի կուսակցութեան Երիտասարդականի ներկայացուցիչները առարկելով ներկայացուած բանաձեւի կարգ մը կէտերուն դէմ՝ առաջարկեցին փոփոխութիւններ ըստ հետեւեալի.

– բանաձեւէն հանել ցեղասպանութիւն եզրը եւ փոխարինել կոտորածներ բառով՝ նկատի ունենալով, որ իրենց կուսակցութեան համար տակաւին վերջնականապէս յստակ չէ, թէ տեղի ունեցածը ցեղասպանութիւն է: Միաժամանակ նման բանաձեւի ընդունումը կրնայ ազդել կուսակցութեան վարկանիշին վրայ՝ Թուրքիոյ մէջ տեղի ունենայիք յառաջիկայ խորհրդարանական ընտրութիւններուն:

– Թուրքիոյ ժխտողական քաղաքականութիւնը դատապարտող նախադասութիւնը հանել, քանի որ վիրատրական է իրենց կազմակերպութեան համար:

– բանաձեւին մէջ աւելցնել մէկ կէտ, ըստ որուն, Հայաստանը եւ բոլոր երկիրները պէտք է բանան իրենց արխիւները եւ Հայաստանն ու Թուրքիան պէտք է կեանքի կոչեն միջպետական յանձնախումբ մը՝ ուսումնասիրելու Հայոց հարցը, քանի որ պէտք չէ պատմական հարցերը քաղաքականացնել:

Թուրք պատուիրակներու առարկութիւններուն պատասխանեցին Գերմանիոյ Ընկերվար-ժողովրդավարական կուսակցութեան Երիտասարդականի եւ Ֆրանսայի Երիտասարդ ընկերվարականներու շարժման ներկայացուցիչները: Գերմանացի երիտասարդները դատապարտեցին թուրք երիտասարդներուն կեցուածքը, յատկապէս անոնց ժխտողական դիրքորոշումը՝ շեշտելով, որ այն ինչ որ կատարուած է հայերուն նկատմամբ անվիճելիօրէն ցեղասպանութիւն է, բաց են Հայաստանի արխիւները, պատմաբանները արդէն 100 տարիէ ի վեր կ'ուսումնասիրեն այդ արխիւները եւ ապացուցուած է, որ տեղի ունեցածը ցեղասպանութիւն է: Ֆրանսացի երիտասարդները երկրորդելով գերմանացի պատուիրակներուն ըսածները, նշեցին բռնի կրօնափոխ դարձած հայերու եւ անոնց ինքնութեան տազնապի հարցերը:

ՀՅԴ Երիտասարդականի ներկայացուցիչը խօսեցաւ Թուրքիոյ ժխտողական քաղաքականութեան հետեւանքներուն մասին եւ ափսոսանք յայտնեց, որ Թուրքիոյ Հանրապետական ժողովուրդի կուսակցութեան Երիտասարդականի ներկայացուցիչները կը կրկնեն Թուրքիոյ իշխանութիւններուն դիրքորոշումները, փոխանակ, իբրեւ Երիտասարդներ՝ համարձակութիւն ունենալու իրերը իրենց անունով կոչելու:

Ժողովը մերժեց Հանրապետական ժողովուրդի կուսակցութեան Երիտասարդականի առաջարկները եւ ընդունեց Շուէտի Ընկերվար-ժողովրդավարական Երիտասարդական լիկայի առաջարկը: Աւարտին բոլոր պատուիրակները, բացառութեամբ թուրքերուն, քուէարկեցին ներկայացուած բանաձեւին օգտին:

ՄԻՋԱԶԳԱՅԻՆ

Էրտողան «Նիւ Եորք Թայմզ»-ը, «Պի.Պի.Սի.»-ն Եւ «Սի.Էն.Էն.»-ը Կ'ամբաստանէ Թուրքիան Մասնատել Փորձելու Յանցանքով



Թուրքիոյ նախագահ Ռեճեփ Թայիփ Էրտողան «Նիւ Եորք Թայմզ»-ը, «Պի.Պի.Սի.»-ն եւ «Սի.Էն.Էն.»-ը ամբաստանեց «զերագոյն միտք»-ի ցուցմունքներուն հիմամբ Թուրքիան տկարացնել եւ ապա զայն քայքայել փորձելու յանցանքով:

Էրտողան անձնական «Շոու Թի.Վի.» պատկերասփիւռի կայանին յայտնեց. «Մտածեցէ՛ք այս մասին. այս օրաթերթը

(«Նիւ Եորք Թայմզ»-ը, «Ա.») 1896-ին նոյն բանը ըրաւ Սուլթան Ապտուլ Համիտին դէմ: Անիկա կը գործադրէ որոշ ուժի մը կողմէ ճշդուած պարտաւորութիւնը: Անիկա այդ ուժին կը ծառայէ՝ վերջինիս ցուցմունքին համաձայն: Այսօր ալ նոյնը տեղի կ'ունենայ: Անիկա իր պարտականութիւնը կատարեց Կեզիի դէպքերուն(2013-ին, «Ա.») ընթացքին եւս, ինչպէս գիտէք: Ճիշդ ինչպէս ըրին «Պի.Պի.Սի.»-ն եւ «Սի.Էն.Էն.»-ը»:

«Նիւ Եորք Թայմզ» վերջերս խմբագրականով մը բռուն կերպով քննադատած էր Թուրքիոյ մեջ մամլոյ ազատութիւնը սահմանափակելու Էրտողանի քայլերը եւ ՕԹԱՆ-ին ու Միացեալ Նահանգներուն կոչ ուղղած էր՝ Էրտողանին յորդորելու՝ «քանդիչ ընթացքէն ետդարձ կատարելու»:

Էրտողան ըսաւ, որ «Նիւ Եորք Թայմզ»-ը անցեալին նախկին նախարարներ Ատնան Մենտերեսի եւ Թուրկուրթ Էօզալի դէմ ալ դաւադրութիւն հիւսած է:

«Դուք գիտէ՞ք ինչ է անոնց նպատակը. Թուրքիան տկարացնել, որպէսզի զայն մասնատեն ու քայքայեն եւ ապա զայն կու տան: Սակայն պիտի ձախողին: Մենք ատիկա պիտի չարտօնենք», ըսաւ ան՝ աւելցնելով, որ միջազգային վերոնշեալ լրատուամիջոցները «զերագոյն միտք»-ի մը շահերուն կը ծառայեն:

Իրան Հաւանական Կը Նկատէ «Թրքական Հոսք»-ին Միջոցով Իր Կազի Արտածումը Եւրոպա

Իրանի ազգային կազի ընկերութեան միջազգային կապերու գծով տնօրէն Ազիզուլահ Ռամազանի «ՌԻԱ Նովոսթի» գործակալութեան հետ զրոյցի մը ընթացքին ըսած է, որ Իրանը արեւմտեան պատժամիջոցներու ջնջումէն ետք կրնայ օգտագործել «Թրքական հոսք»

կազատարը՝ իր կազը Եւրոպա արտածելու համար, եթէ այդ ճամբան թեւրանի մէջ առաւել նպատակայարմար նկատեն:

Ըստ անոր, «կրնան ըլլալ գործունէութեան ընդհանուր մարզեր, օրինակ՝ կազատարերու մարզին մէջ: Ինչպէս նաեւ կարելի է փոխանակել փորձառութիւնը եւ ճարտարագիտութիւնները, օրինակ՝ կազամատակարարման մարզին մէջ, կարելի է փոխանակել փոխանցման համակարգի, հսկողութեան մասին տեղեկութիւնը:

«Իսկ հետագային կարելի է՝ դէպի Եւրոպա երկարող իրանեան եւ ռուսական կազի խողովակաշարերը միանան եւ միասին կազ մատակարարեն Եւրոպա», ըսած է պաշտօնատարը՝ նշելով, որ իրանեան կազը որոշ հանգրուանի մը մէջ կրնայ մօտենալ «Թրքական հոսք»-ին:



Միեւնոյն ժամանակ նշուած է, որ այդ ուղղութեամբ տակաւին ոչ մէկ բանակցութիւն կատարուած է:

Ռուսիոյ նախագահ Վլատիմիր Փութինի՝ Թուրքիա կատարած այցելութեան ընթացքին երկու երկիրները համաձայնութիւն գոյացուցած են Սեւ ծովու յատակով կազի խողովակաշարի կառուցման մասին:

Միւս կողմէ, «ՌԻԱ Նովոսթի» կը հաղորդէ, որ գերմանական «Վինթերգիալ» ընկերութեան ղեկավար Մարիօ Մերեն յայտարարած է, որ Եւրոպայի մէջ չկան ուժանիւթի մարզի ընկերութիւններու համախմբումներ, որոնք պատրաստ են ներդրումներ կատարելու Թուրքիոյ հետ կազի խողովակաշարի հանգոյցի կառուցման համար:

«Ինչ կը վերաբերի Թուրքիոյ մէջ կազի խողովակաշարի հանգոյց ստեղծելուն, որպէսզի ետքը կազ մատակարարուի հարաւային եւ հարաւարեւելեան Եւրոպային, ես ասոր որոշ չափով թերահաւատօրէն կը վերաբերիմ, որովհետեւ ես Եւրոպայի մէջ չեմ տեսներ ուժանիւթի մարզի ընկերութիւններու որեւէ համախմբում, որ պատրաստ պիտի ըլլայ ներդրում կատարելու այդ նախագիծին մէջ», Փարիզի մէջ Կազի համաշխարհային խորհրդածողովին ընթացքին ըսած է ան:



Մարիօ Մերեն նշած է, որ Մակեդոնիոյ եւ Յունաստանի տարածքէն անցնող կազի խողովակաշարի կառուցման հարցին մէջ լաւատեսութիւն չի ցուցաբերեր, որովհետեւ դժուար պիտի ըլլայ գտնել ընկերութիւններ, որոնք այդքան սեղմ ժամկետներու մէջ ստանձնեն այսպիսի ծրագիրի իրականացումը:

ԱՆԴՈՒՄԱՐ

Հայկական Սփիւռքը Պիտի Կարենա՛յ Ինքզինք Վերամտածել

Յուշագրութեան, գեղագետի, պատմագետի, կրօնական համայնքի, հայասերի, մասնակի կացութիւններէն անդին՝ հայկական սփիւռքը, իր բաղադրամասերով, պիտի կարենա՛յ ինքզինք վերամտածել որպէս իրաւութեամբ ազգի անքակտելի եւ անբաժանելի մաս: Ազգի մաս, ո՛չ օտարերկրացի, ո՛չ ծագումով հայ, ո՛չ յաւերժական ըլլալու յաւակնութեամբ սփիւռք, որ կը յաւակնի տեւել որպէս ազգի հատուած՝ զբօսաշրջիկի յուզումներով, հեռուէն դիտող:

Ճատերու մէջ ընթացիկ դարձած բառապաշարով կը յայտարարենք այլեւս բան չնշանակող տարազը. մէկ ազգ, մէկ մշակոյթ, մէկ հայրենիք: Տարտղնուած հաւաքականութիւններով ինչպէ՛ս մէկ կ'ըլլայ ազգը, մէկ մշակոյթը ինչպէ՛ս կ'ըլլայ, երբ հայը օտարալեզու գրականութիւն կը ստեղծէ, հայկական երաժշտութեան հետ ո՛չ հեռուէն եւ ո՛չ մօտէն առնչուող մեղեդիներով կ'երգէ (երէկ թրքերէն, այսօր՝ ճազային, արաբական, հարաւամերիկեան, եւրոպական), հայերէնը կ'աղճատէ եւ կամ կը խօսի աշխարհի բոլոր լեզուներով՝ յիշատակի կամ համեմի վերածելով հայերէնը, երբեմն ալ սնապարծութեան առիթներ ընծայելով օտարին համար եւ օտար երկիրներու տակ նուաճուած փառքերով:

Ինչո՞ւ կը խուսափինք խորքի աւերի մասին խօսելէ, ի՞նչ կը կարծենք փրկել՝ բացի անորոշ եւ հետզհետէ անդիմագիծ խմբակներէ:

Հայրենահանումէն հարիւր տարի ետք, մեր օրերու աղէտ-արտագաղթով յատկանշուող հեռացումէն ետք, երբ սփիւռքը կը սկսինք համարել մնայուն, առանց գիտակցելու, որ այդ մնայունը այդքան ալ մնայուն չի կրնար ըլլալ ընկերաքաղաքական եւ տնտեսամշակութային ճնշումներու տակ, ոչ ալ որպէս հետեւանք՝ մեր յաջորդական տեղատուութիւններուն եւ պատշաճեցման ընտրանքներուն: Ճատերը չեն փոխեր կոպիտ իրականութեան ընթացքը, որքան որ ալ հին եւ նոր էսթեպլիշմընթները, այլազան շահախնդրութիւններով, օրօրէն գանգուածները, անոնք, որոնք դեռ չեն մաշած, կամ մաշումի ընթացքի մէջ են, զգացումով հայեր կամ ծագումով հայեր, օրինակելի կերպով մերուած հայեր (հիւրընկալ երկիրներու կողմէ մեզ շոյող շնայլուած խօսք, որ մեր սին հպարտութիւնը դարձած է), երբ արդէն ոմանք բառային մարզանքներ կ'ընեն ճշդելու համար, որ կէս, քառորդ, կամ մէկ վաթսուներորդ հայեր կան, եւ կամ, առանց ծիծաղելի ըլլալու վախի ըսուած՝ հարիւր տոկոսով հայեր, որոնք միաժամանակ հարիւր տոկոսով ֆրանսացի, անգլիացի, ամերիկացի են... Առասպելական հերոսներ՝ ծիծաղելիութենէ չվախցող: Կրնանք միտքի մարզանքը երկարել՝ առանց անհանգստանալու:

Գոյութեանական խնդիր կայ: Առանց բառերու շուրջ դառնալու՝ պիտի ըմբռնենք, որ հայութիւնը դատապարտուած է այլոց կողմէ կամ ինքզինք կը դատապարտէ քոչուորի վիճակին, որ մնայուն քոչուորութիւն կը դառնայ հետզհետէ, երէկ բացատրուող, այսօր ըստ ամենայնի մերժելի, եթէ մեկնակէտ ընդունինք հայրենակերտում եւ ազգակերտում միաձուլուած գոյգը, որ կ'ենթադրէ անհատականի գերանցումը: Քոչուորը բանտարկեալն է անհատականի, որուն մէջ ժամանակ մըն ալ կրնայ տեւել ազգային պատկանելիութեան զգացում մը, ճիշդ այնպէս, ինչպէս սովորութիւն դարձած է ըսել՝ զգացումով հայ, անհորիզոն եւ անկողմնացոյց, որ իր վրանը կրնայ զարնել ամենուրեք՝ Նոր Զելանտա կամ Լաս Վեկաս՝ արբեցնող խաղատուներուն մօտ ըլլալու համար: Քոչուորութիւն՝ հետեւելով պարարտ մարգագետիններու հասցէին:

Ինչպէ՛ս եւ ինչո՞ւ վերամտածել սփիւռքի վաղը: Ո՞ր հորիզոններուն պիտի բացուի այդ վաղը, ի՞նչ ընելու համար, որպէս ի՞նչ՝ շարունակութիւն ըլլալ-չըլլալու յարաբերաբար: Մինչեւ ե՞րբ թափահարումներով կրնայ տեւել ազգի աւելի քան կէսը, որպէս համրանք ըմբռնուած կէս, ոչ անպայման որպէս որակ: Անհատներ եւ ընտանիքներ պիտի տեւեն, ազգականական կապեր պիտի պահուին, բայց անոնք դարերու շարունակութիւն եւ հաւատարմութիւն պիտի չըլլան, քանի որ պիտի փոխուին լեզուներ, արձեւներ, պիտի յառաջանան խառնուրդներ:

Ճշգրիտ ոչ մէկ գնահատում կրնանք ընել սփիւռք(ներ)ի թուական պատկերի մասին՝ նոյնիսկ տասը կամ քսան տոկոսով սխալելու իրաւունք տալով մենք մեզի: Մարդահամարի նմանող ընկերաբանական ուսումնասիրութիւն մը կրնայ օգնել կացութիւնները ըմբռնելու: Սովորաբար կ'ըսենք՝ մեր ժողովուրդի կէսէն անէլի: Հիմա Երեւանի մէջ կրնաք լսել, որ Մոսկուայի հայերու թիւը շատ անէլի մեծ է, քան՝ նոյնինքն Երեւանի: Ի՞նչ է հայոց թիւը Միացեալ Նահանգներու մէջ, առանձին առած հսկայական ոստան (méga-pole) Լոս Անճելըսի մէջ, կամ Ֆրանսա, Սան Փալօ: Սահմանելով որոշ չափանիշներ, ինչպէս կրնանք գնահատել այդ հաւաքականութիւններու հայկական որակը: Այդ որակը բաւարար երաշխիք է ինքնուրոյնաբար տոկալու եւ տեւելու համար:

Չեմ գիտեր՝ ո՞ր ամօթխածութեան տուրք տալով չենք խօսիր համաճարակ դարձած խառն ամուսնութիւններու մասին, որոնք ձուլումը բազմապատիկ կշռոյթով կ'արագացնեն, եթէ բացառիկ պարագաներ յիշելով ինքնախաբէութեան անձնատուր չըլլանք: Մեծ ոստաններու մէջ բնակչութիւն հաստատած հայերը, շրջապատի ընկերամշակութային եւ տնտեսական ահեղ հոսանքին մէջ ինչպէ՞ս պիտի կարենան տեւել, երբ հայկականութիւն ապրիլ միայն շաբաթավերջի գուարճութիւն է՝ տեսանելի որպէս մասնաւորներու խմբակ, երբ անդին անտեսանելի զանգուած մը կայ, որ կը հալի՝ առանց կարենալ ընդդիմանալու, ընդդիմանալ ուզելու: Միամտութիւն է տեսնել միայն փոքրամասնութիւնները, որոնք դեռ կը դիմանան հօգոր կամք ցուցաբերելով, երեւակայելով, որ կան նաեւ միւսները, որոնք բացականեր են անհետացած ըլլալէ առաջ:

Հայկական սփիւռքի հայկական ապագան հայրենադարձութիւնն է: Ազգի լինելութեան օրակա՞րք է այս ապագայի հարցը: Ասկէ անդին կրնանք իրարանցումներ ստեղծել բարեսիրութեան կամ ծանօթացման աշխատանքներով, լոպպիլիսկով, ո՞ր հասնելու համար:

Առանց ճապկումներու հայրենադարձութեան ազգային-քաղաքական միտքը կենսագործել իսկական քաղաքականութիւն պէտք է ըլլայ եւ չէ: Հայաստանի Հանրապետութիւն եւ Արցախի համայն հայութիւնը ընդունելու չափ տարածութիւն ունին: Իսկ բնակեցման համար անհրաժեշտ են կազմակերպութիւն եւ ազգային գիտակցութիւն՝ անհատականէն անդին սեւեռելով հաւաքականը: Ոչ ոք թող ըսէ, թէ դեռ կանուխ է, որ ինձի համար ուշ է: Հայրենադարձութիւնը հեռաւոր (կամ անկարելի) նպատակ համարել պարտաւորականութիւն է, ան անմիջական նպատակ պէտք է ըլլայ:

Քաղաքական միամտութիւնը ազգային ոճիրի համագոր է: Պէտք է տեսնել եւ եզրակացնել, որ մեր մերուած քաղաքացի հայը դատապարտուած է ծագումով հայ ըլլալու, եւ հուսկ անհետանալու: Եթէ ցեղասպանութիւն չըսէք, գտէք տարբեր բնորոշում: Մէկ սերունդ առաջ կ'ըսէին ճերմակ ջարդ:

Հետեւաբար հայրենադարձութիւնը հայ ազգային քաղաքականութեան առաջնահերթութիւնն է, որպէսզի զանգուածները չվերածուին յիշատակներու, ընդհանուր ազգաց պատմութեան գիրքերու մէջ արձանագրութիւններու: Իրատեսութիւնը այլ բան կրնա՞յ ըսել:

Հայրենադարձութիւն՝ հակառակ դժուարութիւններու, գորս հարկ է յաղթահարել հաւաքական ճիգով եւ կամքով: Բոլոր միւս կազմակերպական թափահարումները եւ ցուցական հրավառութիւնները անվաղորդայն են, անվաղորդայն ըլլալու կոչուած են, էսթեպլիշմընթի գուարճութիւն են հայրենադարձութեամբ չընդգրկուելու համար:

Հայրենադարձութիւնը մեքենաբար կրկնուող կարգախօսի մակարդակէն պէտք է բարձրացնել կազմակերպական հետապնդուող ծրագրով իրականացումի:

Եւ ըստ այնմ դատել պետութիւնը, կազմակերպութիւնները եւ էսթեպլիշմընթի աստղերը:

Պետութիւնը ինչո՞ւ պիտի չձեռնարկէ հայրենադարձութեան գրասենեակներու ստեղծման:

Յ. ՊԱԼԵԱՆ

ԱԿՆԱՐԿ

Էրտողան Կ'արծարծէ Թուրքիոյ Մասնատման Վտանգի Հնարաւորութիւնը

7 Յունիսին Թուրքիոյ մէջ տեղի ունենալիք խորհրդարանական ընտրութիւնները իրենց վրայ կը հրաւիրեն դիտարժան բազմահայեացքային մօտեցումներ: Պարզ է, որ գործող իշխանութիւններու գլխաւոր առաջադրանքը՝ նախագահ Էրտողանի կուսակցութեան խորհրդարանին մէջ մեծամասնութիւն ապահովելն է: Արդարութիւն եւ բարգաւաճումը այսպիսով կը փորձէ իրականացնել նոր սահմանադրութեան մշակումը: Իսկ այստեղ գերխնդիրը գործող նախագահի լիազօրութիւններու ընդլայնումն է:



Այստեղ հայկական ոսպնեակը անմիջապէս համեմատութիւն կը կատարէ պաշտօնական Երեւանի հրապարակած առաջադրանքին հետ: Մշակել սահմանադրութիւն ոչ թէ ընդլայնելու, այլ սահմանափակելու նախագահի լիազօրութիւնները՝ անցնելով խորհրդարանական համակարգին:

Հայկական ոսպնեակը պահելով արագ անցում կատարենք Եւրոպական ոսպնեակին, որովհետեւ նոյն իշխող կուսակցութեան գլխաւոր առաջադրանքներէն է նաեւ Եւրոպական կառոյցներու համարկումն ու դէպի Եւրոպական Միութիւն ուղղութիւնը: Եւ անմիջապէս դարձեալ արծարծենք համեմատական քաղաքական տրամաբանութիւնը յիշելու համար, որ Երեւանի մէջ սահմանադրագէտներու յանձնախումբը սահմանադրութեան բարեփոխման յօդուածները կը քննարկէ դէպի Եւրոպա ընթացող երկիրներու սահմանադրական բարեփոխումներու հարցերով զբաղող Եւրոպական համապատասխան կառոյցին՝ Վենետիկի յանձնաժողովին հետ: Այս այն յանձնաժողովն է, որ քանի մը տարբեր առիթներու ողջունած է Հայաստանի Հանրապետութեան սահմանադրութեան բարեփոխումներու նախագիծի հիմնադրոյթները:

Այս ինքնին կը նշանակէ, որ սահմանադրութեան գլխաւոր բարեփոխումը նախագահականէն խորհրդարանական անցումը կամ ժողովրդավարական կարգերու ընկալմամբ միանձնեայ հիմքի վրայ կառուցուած գերգործառոյթներու բաշխումը օրէնսդիր եւ գործադիր հաստատութիւններու դրական գնահատուած է համաԵւրոպական օրէնսդրական գերատեսչութիւններու կողմէ:

Իրաւաքաղաքական իրադարձութիւններուն մէջ առկայ է շաղկապուածութեան գործօնը: Ռիկայի մէջ Երեւանի ձեռք բերած արդիւնքը կամ Եւրասիական տնտեսական

միութեան անդամակցած Հայաստանի Հանրապետութեան – Եւրոպական Միութեան հետ վերաբանակցելու ազդանշանի սկիզբը անպայման աղերս ունի եւրոպական քաղաքական արժեհամակարգին ընդառաջ սահմանադրութիւն բարեփոխելու Երեւանի կամքին հետ:

Անգարային առնելիք քայլը յետքայլի համոզումը կը փոխանցէ: Տարբեր հարց, որ տակաւին լիազօրութիւններ չիրաւականացուցած Էրտողանը գերութի կուտակում ապահոված է իբրեւ նուազ լիազօրութիւններ ունեցող նախագահ: Թուրքիոյ պարագային, լիազօրութիւնները պաշտօնէ պաշտօն կ'անցնին իշխող անձին հետ: Ուժի կեդրոնը վարչապետական պաշտօնէն այսօր արդէն իսկ անցած է նախագահական պաշտօնին իրողապէս. կը մնայ զայն իրաւականացնելը սահմանադրութեամբ:

Գերլիազօրման ընթացքի մէջ եղող Թուրքիոյ նախագահը այս օրերուն ուժի կեդրոն ըլլալու հռետորական հարցեր կը հնչեցնէ շատ հասկնալիօրէն ընտրարշաւի պարունակին մէջ ներքին շուկային արտադրատեսակներ հրամցնելով: Պէտք չէ արագ անցնիլ նաեւ հետեւեալ իրադարձութեան վրայէն:



Էրտողանը նաեւ մեղադրած է արեւմտեան զանգուածային լրատուամիջոցները այն ուժերուն աջակցելու մէջ, որոնք կը ձգտին «տկարացնել եւ մասնատել երկիրը»:

«Հասկանալի է, թէ ո՛ր ուժերն են այս բոլորին ետեւ կանգնած: Անոնք կ'ընթանան այն ուղղութեամբ, որ իրենց ցոյց կը տրուի: «Պի. Պի. Մի.»-ն եւ «Մի. Էն. Էն.»-ը նոյն մեկնաբանութիւնները կ'ընէին Կեզիի բողոքներուն ատեն: Դուք գիտէք, թէ ո՛րն է անոնց նպատակը: Անոնք կը ցանկան թուլցնել Թուրքիան, մասնատել զայն եւ կուլ տալ: Բայց մենք թոյլ չենք տար, որ նման բան պատահի: Անոնք չեն յաջողիր», յայտարարած է Էրտողան:

Կը ստացուի այն, որ անհրաժեշտ է, որ մեծամասնութիւն ստանայ, իշխող կուսակցութիւնը եւ գործող նախագահը նոր սահմանադրութեամբ ստանայ լիազօրութիւններ Թուրքիան փրկելու համար տկարացումէ եւ մասնատումէ:

Հասկնալի է, որ ներքին սպառումի համար բարձրացուած են հռետորաբանութեան եւ ստեղծուած կացութիւններու վտանգաւորութեան աստիճանաչափերը: Հետաքրքրականը այն է, որ ամէնէն բարձր մակարդակէն կ'արժարծուի Թուրքիոյ մասնատման հնարաւորութիւնը: Վերադառնալու համար հայկական ոսպնեակին՝ 100-ամեակի տարուան ընթացքին:

«Ա.»

ԼՈՒՐԵՐ ԳԱՂՈՒԹՆԵՐԷՆ

Ոգեկոչական Հանդիսություն

Հովանավորությամբ Հալեպի նահանգապետ դոկտ. Մարուան Ուլապիի եւ կազմակերպությամբ Ազգ. սկզբունքներու ընդհանուր խորհուրդին, Հաշտեցման ժողովրդային յանձնախումբին եւ Հալեպահայ կազմակերպություններու համախմբումին, շաբաթ, 2 մայիս 2015-ին, Հալեպի պետական համալսարանի «Պասել Ասատ» սրահին մէջ Սուրիոյ նահատակաց տօնին եւ Հայոց ցեղասպանութեան հարիւրամեակին գոյգ առիթներով տեղի ունեցաւ «Ժողովուրդներու պատմութիւնը կը գրուի նահատակներու արիւնով» խորագիրը կրող ոգեկոչական



հանդիսութիւն մը:

Հանդիսութեան բացումը կատարուեցաւ սուրիական քայլերգով, ապա խօսք առաւ Ազգ. Քարէն Եփփէ Ճեմարանի տնօրէն Յակոբ Քիլեճեան: Ան հայ ժողովուրդին անունով երախտագիտութիւն յայտնեց Սուրիոյ արաբ ժողովուրդին, որ սրտաբաց ընդունեց Եղեռնէն ճողոպրած հայերը:

Խօսք առաւ նաեւ Ազգ. սկզբունքներու ընդհանուր խորհուրդի ատենապետ Մահմուտ Եասին, որ անդրադարձաւ հայ եւ արաբ ժողովուրդներու բարեկամութեան եւ նահատակութեան խորհուրդին:



Այս առիթով արաբերէն ազգագրական շարք մը երգերով ելոյթ ունեցաւ Համազգայինի «Զուարթնոց» երգչախումբը՝ խմբավարությամբ Յարութ Ալապոզանեանի, դաշնամուրի ընկերակցությամբ Ռուզան Պարսումեանի:

Յուցադրուեցաւ Հայոց ցեղասպանութեան նուիրուած եւ Սուրիոյ տագնապին մէջ թրքական կառավարութեան զօրակցութիւնը վայելող զինեալ ահաբեկիչներու բարբարոսութիւնները ցոյց

տուող տեսերիզ մը: Ապա իւրաքանչիւր կազմակերպող կողմ մեծարեց Սուրիոյ տազնապին զոհուած եօթը նահատակ՝ անոնց ընտանիքներուն փոխանցելով խորհրդանշական յուշանուէրներ: Հալէպահայ մեծարուող նահատակներու շարքին էին՝ Վիզէն Հայրապետեան, Յակոբ Տէր Պօղոսեան, Վրէժ Քէշիշեան, Գրիգոր Աշնազլեան, Անդրանիկ Քահքեճեան, Յովսէփ Պշաքճեան եւ Սարգիս Սոլաքեան:

ՍՕԽ «Էրեբունի» Մասնաճիւղը Կը Նշէ Մայրերու Տօնը

ՍՕԽ-ի Դամասկոսի «Էրեբունի» մասնաճիւղի վարչութեան կազմակերպութեամբ Մայրերու օրուան տօնակատարութիւնը պատշաճ կերպով նշուեցաւ շաբաթ, 23 մայիս 2015-ին, Հայ կաթողիկէ «Ամինեան» սրահին մէջ՝ ներկայութեամբ Շրջանային վարչութեան ներկայացուցիչ Սիլվա Գորեսեանին, միութիւններու ներկայացուցիչներու, հիւրերու, բարեկամներու եւ մեծ թիւով անդամներու:



Հայաստանի եւ Սուրիոյ քայլերզներու ունկնդրութենէն ետք վարչութեան ատենապետ Սոնա Քիրտեան կատարեց հանդիսութեան բացման խօսքը, որմէ ետք գեղարուեստական յայտագիրով հանդէս եկան Նորա Պալեանը՝ ասմունք՝ «Մայր», Անի Գարակէօզեանը՝ ասմունք՝ «Սօր ձեռքերը», Շիրազ Այարեանը՝ մեներգ՝ «Հայրենիքէս հեռացել եմ», Ասպետ Քելիսաճարեանը՝ մեներգ՝ «Հորովել», Մեղրի Պետիբեանը՝ մեներգ «Թամամ աշխարհ», դաշնակի ընկերակցութեամբ Արօ Ճունտուրեանի:



Օրուան պատգամը փոխանցեց դոկտ. Նորա Արիսեան, որ մատնանշեց, թէ այս տարի Մայրերու տօնը կը նշուի տարբեր կերպով, նախ՝ սուրիական վերջին պատերազմի առանցքով, երկրորդ՝ Հայոց ցեղասպանութեան բովանդակութեամբ, քանի որ այսօր հայութիւնը թէ՛ Հայաստանի մէջ եւ թէ՛ սփիւռքի մէջ Հայոց ցեղասպանութեան հարիւրամեակը կը նշէ մեծ տարողութեամբ, շեշտելով, որ ազգի զաւակներուն հետ հայ մայրը պիտի մասնակցի Հայոց ցեղասպանութեան 100-րդ տարելիցի ձեռնարկներուն՝ որպէս կարեւոր հանգրուան պատմական արդարութեան համար մղուող պայքարը «Կը յիշեմ եւ կը պահանջեմ» կարգախօսով շարունակելու գործընթացին:

Սոյն ձեռնարկին վարչութիւնը պարգեատրեց 1979-1980 տարիներու անդամագրուած 21 ՍՕԽ-ականները՝ մասնաճիւղի ատենապետ Սոնա Քիրտեանի ձեռամբ: Ան պարգեատրեալներուն յիշեցուց, որ այս շքանշանը խթան պէտք է հանդիսանայ իւրաքանչիւրին՝ առաւել եւս խմբուելու ՍՕԽ-ի մեծ ընտանիքին շուրջ, նոր կորովով եւ հաւատքով շարունակելու իրենց նուիրական ծառայութիւնը ՍՕԽ-ի սրբազան առաքելութեան մէջ: Այս առթիւ Շրջանային վարչութեան ներկայացուցիչ Սիլվա Գորեսեան իր սրտի խօսքը փոխանցեց ներկաներուն՝ շեշտելով մօր սրբութիւնը եւ անոր դերակատարութիւնը թէ՛ ընտանեկան յարկին տակ եւ թէ՛ ազգային կեանքին մէջ:

«Հայոց Գեղասպանություն» Գիրքը՝ Վրացերեն



Մայիս 16-ին Թիֆլիսի «Մարիոթ» պանդոկին մեջ տեղի ունեցավ Հայաստանի Գիտություններու Ազգային ակադեմիայի նոր պատմության բաժնի վարիչ, պատմական գիտություններու դոկտոր Ռուբեն Սահակեանի «Հայոց ցեղասպանություն» գիրքի վրացերեն հրատարակության շնորհահանդեսը:

Օրուան հանդիսավար, գիրքի հրատարակության աշխատանքային խումբի ղեկավար Գիսանե Յովսեփեան անդրադարձավ Հայոց ցեղասպանության 100-ամեակի ձեռնարկները համակարգող Վրաստանի յանձնախումբին կատարած աշխատանքներուն՝ շեշտելով կարեւորութիւնը վրաց հասարակության իրենց մայրենի լեզուով Հայոց ցեղասպանության մասին գիտականօրէն հիմնաւորուած գրականութիւն մատուցելը: Ան ներկայացուց աշխատանքային խումբին անդամները, որոնց աշխատանքին որպէս արդիւնք՝ իրականացաւ գիրքին հրատարակութիւնը:

Դոկտ. Ռուբեն Սահակեան շնորհակալութեան խօսքեր ուղղեց վիրահայոց թեմի առաջնորդին, որուն աջակցութեամբ կրցաւ իրականացնել իր աշխատութեան թարգմանութեան հրատարակութիւնը: Ան նշեց, որ գիրքը աւելի ծաւալուն է եւ իր ամբողջական տեսքով հայերէն տարբերակով պիտի ներկայացուի այս տարուան աւարտին: Ան բացատրեց, թէ գիրքի հրատարակութեան նպատակն է վրացի ընթերցողին պարզ եւ համառօտ ներկայացնել Ա. Համաշխարհային պատերազմի տարիներուն Արեւմտեան Հայաստանի եւ Օսմանեան կայսրութեան տարածքին Թուրքիոյ կողմէ իրականացուած ցեղասպանութեան քաղաքականութեան պատմութիւնը, նաեւ՝ տարբեր քաղաքներուն ու գիւղերուն մէջ հայերու ինքնապաշտպանութեան ճակատամարտերը, որոնց շնորհիւ արեւմտահայութեան մէկ մասը փրկուեցաւ ոչնչացումէ եւ հաստատուեցաւ աշխարհի տարածքին տարբեր երկիրներու մէջ:

Թարգմանիչ Ջոյա Մխիթարեան խօսեցաւ գիրքին վրայ աշխատած աստէն իր ապրումներուն եւ յուզումներուն մասին:

Օրուան բանախօս, Գիտություններու Ազգային ակադեմիայի պատմության հիմնարկի տնօրէն, ակադեմիկոս Աշոտ Մելքոնեան կարեւոր նկատեց Հայոց ցեղասպանութեան մասին աշխարհի 35 լեզուներով 55-60 երկիրներու արխիւային եւ պատմական նիւթերու հրատարակումը՝ աւելցնելով, որ այդ նիւթերու լուսանկարային պատճէնները դրուելով Հայոց ցեղասպանութեան մասին աշխատութիւններուն մէջ՝ անհերքելի կը դարձնեն Թուրքիոյ կողմէ իրականացուած ոճրագործութիւնը: Ան մաղթեց, որ վերոնշեալ աշխատութիւնը իր ներդրումը կ'ունենայ վրաց իշխանութիւններու կողմէ արդարութիւնը ճանչնալու եւ Հայոց ցեղասպանութիւնը դատապարտելու գործին մէջ:

Վիրահայոց թեմի առաջնորդ Վազգէն եպս. Միրզախանեան կարեւոր իրադարձութիւն համարեց Հայոց ցեղասպանութեան մասին վրաց հասարակութեան իրազեկման նպատակով առաջին ակադեմիական գիրքի հրատարակութիւնը՝ ընդգծելով, որ Ցեղասպանութիւնը այսօր ալ կը

շարունակով, ուստի քաղաքակիրթ աշխարհին կոչ ուղղեց համարձակօրէն նայելու ճշմարտութեան եւ չշեղելու արդարութեան ճանաչումէն:

Գիրքը յատկացուած է Ցեղասպանութեան պատմութիւնը ուսումնասիրողներու, պատմաբաններու եւ ընթերցողներու լայն շրջանակներուն համար:

Կոլտո Պատրիարքի Անուան Թանգարանը Պաշտօնապէս Ճանչցուեցաւ



Պոլսոյ հայոց պատրիարքական աթոռի երանաշնորհ գահակալներէն Յովհաննէս Թ. Բաղիշեցի Կոլտո պատրիարքի անունը կրող թանգարանը պաշտօնական ճանաչում ստացաւ:

Կատարուած պաշտօնական ձեւակերպութեանց աւարտին, պատկան իշխանութիւններ Պոլսոյ պատրիարքութեան Կոլտո պատրիարքին անուան թանգարանի տեսուչ Վաղարշակ սրկ. Մերովբեանին յանձնեցին պաշտօնագիրը:

Վաղարշակ սարկաւազ իր կարգին 28 մայիս 2015-ին պատրիարքական ընդհանուր փոխանորդ Արամ արք. Աթէշեանին յանձնեց պաշտօնագիրը:

Սրբազան հայրը իր ուրախութիւնը յայտնեց երկար սպասումէ ետք ստացուած սոյն պաշտօնագիրին համար եւ շնորհաւորեց պատասխանատուները՝ մաղթելով նորանոր յաջողութիւններ:

Ճատրակ, Սպարտակ Գրիգորեան՝ Գերմանիոյ Պատանիներու Ախոյեան



Հայաստանի ճատրակի ֆետերասիոնին պաշտօնական կայքը՝ Armchess.am կը հաղորդէ, որ հայ ճատրակ խաղացող Սպարտակ Գրիգորեան առաւելագոյն 9 կէտէն 6,5 կէտ ապահովելով հանդիսացած է Գերմանիոյ պատանիներու ախոյեան՝ 18 տարեկանէն վար դասակարգին մէջ:

Այս ախոյեանութիւնը տեղի ունեցած է գերմանական Ուիլիսկէն քաղաքին մէջ:

ԿՆՈՋԱԿԱՆ

Մազերու Ծերացումը Հաստատող Եօթը Ազդանշան



Շատեր ունին այն սխալ համոզումը, որ միայն ճերմակ մազերը կը վկայեն մեր մազերուն ծերացման մասին: Կարելի է նշել առնուազն 7 ազդանշան, որոնք կը յուշեն, որ մեր մազերը լուրջ խնամքի կը կարօտին...

Մազերու ծերացման գլխաւոր պատճառը այն է, որ նուազած է, մարմնին կողմէ արտադրուող իւղերու քանակը: Ասիկա պատճառ կը դառնայ, որ մազերը կորսնցնեն իրենց փայլքը, առողջ տեսքը, խոնաւութիւնը: Ասոր վրայ կու գան աւելնալու վատ սովորութիւնները եւ արտաքին

միջավայրի ազդեցութիւնը:

Ծանօթանանք վերը նշուած 7 ազդանշաններուն.

1. *Չոր մազեր*
2. *Կոտրտող մազեր*
3. *Ճիւղաւորուող ծայրամասեր*
4. *Գանգրացող մազեր (սահուն մազ ունեցողներուն պարագային)*
5. *Խամրած գոյնով մազեր*
6. *Ճերմակ մազեր*
7. *Նօսրացող մազեր*



Մազերու նուազագոյն փոփոխութիւն պէտք է գրաւէ ձեր ուշադրութիւնը: Այդ փոփոխութիւնները կը վկայեն ոչ միայն սովորական ծերացումի, այլ նաեւ առողջական հարցերու մասին:

ՇԱԲԹՈՒԱՆ ԲԱՆԱՍՏԵՂԾՈՒԹԻՒՆԸ

Իմ սուրբ հայրենիք, դու սրտիս մէջ ես,
Դու սրտիս մէջ ես, ոչ լեզուիս վրայ,
Իմ սրտի միջից, թէ սիրտս ճեղքես՝
Դրօշիդ բոցը պիտի հուրհրայ:

Յ. ՇԻՐԱԶ